

新元史

第四三册

列傳第六十三

新元史卷一百六十六

賜進士出身日講起居注官翰林院侍讀國史館纂修膠州柯劭忞撰

張禧宏綱

賈輔文備

王國昌通

解誠

趙匣刺

孔元

張洪

趙伯成

虎益

張萬家奴孝忠保童

郭昂嘉

綦公直忙古台

完顏石柱

程介福

張立

張禧東安州人父仁義金末徙益都及太宗下山東仁義乃走信安信安守將張進用爲裨將大兵圍信安仁義率敢死士三百開門出戰圍解以功署軍馬總管固守十年不能支始與進來降率其部曲從宗王合丹略地河南授管軍元帥後攻歸德中流矢卒追贈縣侯禧年十六從大將阿朮魯攻徐州歸德復從元帥察罕攻壽春安豐廬滁黃泗諸州皆有功禧素峭直爲主將所忌誣以他罪欲殺之禧子宏綱入獄省其父獄卒并繫之乘間與父脫械同逸求援於王鶚鶚薦禧與其子宏綱俱入見從世祖南伐進攻鄂州諸軍穴城以入宋樹

柵爲夾城於內入戰者輒不利乃以厚賞募敢死士禧
與宏綱俱應募由城東南入將至城下世祖憫其父子
俱死遣阿里海牙諭禧父子止一人進戰禧槍折取宏
綱槍以入戰良久身中十八矢一矢鏃貫腹悶絕復甦
曰得血竭飲之血出可生世祖亟命取血竭療之瘡旣
愈復從大將納剌忽與宋兵戰於金口李家洲皆捷世
祖卽位賜金符授新軍千戶三年從征李璫時宋乘璫
叛遣夏貴襲取蘄縣宿州等城禧移兵攻之貴走盡復
諸城至元元年擢唐鄧等州民軍總管宋侵均州總管
李玉山敗走帝命禧代之三年與宋將呂文煥戰于高

頭赤山乘勝復均州四年改水軍總管益其軍二千五百令習水戰五年從攻襄樊六年七月夏貴率兵援襄陽禧從元帥阿朮戰却之七年與宋將范文虎戰於雲壽洲九月復戰於竹根灘餓虎崖俘斬二千餘人八年江水暴溢范文虎以戰艦千餘艘援襄陽阿朮命禧夜率輕舟銜枚出敵艦之後插葦識水深淺及還即使禧率四翼水軍進戰宋兵潰追至淺水奪戰艦七十餘艘九年攻樊城焚其串樓敗宋將張貴於鹿門山十年行省集諸將問破襄陽之策禧言襄樊夾漢水爲城敵人橫鐵鎖水中斷鎖以絕其援則樊城必下樊城下則襄

陽可圖行省從之及襄陽降授宣武將軍水軍萬戶佩
金虎符丞相伯顏因命禧爲水軍先鋒十二年敗宋將
孫虎臣於丁家洲九月從阿朮與宋都統姜才戰有功
加信武將軍十三年從下溫台福建十四年加懷遠大
將軍江陰路達魯花赤水軍萬戶十六年入朝進昭勇
大將軍招討使十八年加鎮國上將軍都元帥朝廷議
征日本禧請行卽日拜行中書省平章政事與右丞范
文虎左丞李庭同率舟師至日本禧捨舟築壘平湖島
約束戰艦各相去五十步以避風濤八月颶風大作文
虎庭戰艦悉壞禧所部獨完文虎議還禧曰士卒溺死

者半其脫死者皆壯士也曷若乘其無回顧心因糧於敵以立奇功文虎等不從曰還朝問罪吾輩自當之禧乃分船與之時平壺島尙屯兵四千禧悉棄舟中所有馬七十匹以載兵歸二十八年卒年七十五至治三年贈推誠著節功臣榮祿大夫湖廣行省平章政事桂國齊國公諡忠烈子宏綱字憲臣從禧伐宋屢有功自管軍總把佩銀符換金符爲千戶升總管廣威將軍招討副使加定遠大將軍招討使襲鎮江陰從參政高興破建德溪寨諸賊後賜三珠虎符授昭勇大將軍河南諸翼征行萬戶從右丞劉深征八百媳婦師次八番與叛

蠻宋隆濟等戰歿贈宣忠秉義功臣資善大夫湖廣等處行中書省左丞上護軍追封齊郡公諡武宣子漢當襲職讓其弟鼎漢後爲監察御史累官至集賢直學士鼎襲江陰水軍萬戶

賈輔字元德祁州蒲陰人金貞祐初領鄉兵以功授蒲陰尉尋擢爲令時土豪王知領祁州貪婪爲民害州人逐之推輔爲刺史行臺卽授輔宣武將軍祁州刺史輔保境息民衆安之遷濬州防禦使仍知祁州武仙守眞定潛兵襲之輔挺身來降詔以輔爲萬戶張柔之副仍領祁州事柔開都元帥府於滿城輔行元帥事於祁號

南府從柔定山東屢戰有功遷左副元帥柔開府於保州復以輔副之柔將兵在外輔居守事無鉅細一決於輔輔蒞政嚴明千里之外肅然金亡有朝士五十餘人流徙境內輔厚爲資給由是士論歸之丞相耶律楚材遺書稱美且贈以詩奏輔兼行臺事輔力辭乃以其子文備爲千戶佩金符以輔商處行臺事領順天等路如故亦佩金符憲宗四年入覲和林帝欲以政事畀之輔已疾甚是年卒年六十三帝聞驚悼曰吾方欲用之天遽奪去耶賻廐馬五匹輿歸以葬六子文備最知名文備字仲武襲父千戶張柔命屯三汊口備宋兵宋以

雲梯來攻文備鏖戰却之憲宗賜弓矢銀盃復令襲父
左副元帥職兼領順天路中統二年升開元路女真水
達達等處宣撫使佩金虎符三年遷開元東京懿州等
處宣慰使四年改授萬戶領張柔所部軍屯亳州至元
二年加昭勇大將軍真定路總管兼府尹六年調衛輝
路總管七年授西蜀成都統軍以疾不赴八年授宿州
萬戶尋改河南等路統軍圍襄樊九年移蔡州兼水陸
漕運宋兵截運道文備敗之併奪其船統軍罷敕文備
入覲賜弓矢金鞍錦衣白金十一年復授萬戶漢軍都
元帥領劉整軍駐亳州宋將夏貴引兵來襲文備邀擊

大破之賜金鞍金織文段白金丞相伯顏伐宋文備領左翼軍以從抵鄂州宋築二城夾江布戰艦數千艘於江中陳兵兩岸軍不得進文備引舟由淪河徑出大江攻武磯堡大軍繼之遂取鄂漢以功賜白金加昭毅大將軍守鄂州十二年從平章政事阿里海牙取湖南至潭州城下文備冒鋒鏑礮傷右手流矢中左臂宋轉運判官鍾蜚英等以城降十三年加昭武大將軍守潭州十四年衡永郴等州寇發文備悉討平之十五年進鎮國上將軍湖南道宣慰使徇瓊崖等州及廣東瀕海諸城十六年召還拜浙東宣慰使加金吾上將軍鎮慶元

十八年復授都元帥二十年改江東宣慰使討建甯盜黃華二十二年拜荆湖占城行中書省參知政事二十三年改湖廣行省參知政事二十四年致仕後十七年以疾卒延祐四年贈江西等處行中書省左丞追封武威郡公諡莊武

王國昌膠州高密人初爲膠州千戶中統元年入覲遷左武衛親軍千戶佩金符召問軍旅之事國昌奏對甚悉帝嘉之賜白金錦袍至元五年有上書言高麗境內黑山海道至宋境爲近帝命國昌往視之泛海千餘里風濤洶湧國昌神色自若至黑山乃還帝延見慰勞之

時遣使諭日本令國昌率兵護送道經高麗高麗叛臣據珍島因命國昌與經略使卯突史樞等攻之八年復遣使至日本命國昌屯於高麗之義安郡以爲援冬十月卒於軍子通嗣

通初襲爵爲左衛親軍千戶十二年從諸軍伐宋渡江鎮鄂州時潭州不下兵薄其城通以所將千人破其柵宋兵遁去通縱兵追擊殺獲甚衆以功進武節將軍從攻靜江克之十四年改侍衛親軍千戶明年通上書言今南方已定北陲未安請屯田於和林率所部自効帝慰勞遣之從破叛王於金山俘獲生口及牛馬羊駝不

可勝計進顯武將軍賜金虎符升僉左衛親軍都指揮使從討乃顏遷副都指揮使明年屯田瓜沙諸州進階明威將軍武宗卽位命總京城衛兵樞密院復奏通攝左丞領諸衛屯田兵尋遷屯儲衛親軍都指揮使鎮海口以疾卒子燕出不花襲武德將軍右衛親軍副都指揮使

解誠易州定興人善水戰從伐宋以功授金符水軍萬戶兼都水監使焦湖之戰獲戰艦三百艘援兵不敢動乘勢追敗之奪其軍糧三百餘石從攻安豐壽復泗亳諸州俱有功又從下雲南大理以功賜金虎符從攻鄂

州奪敵艦千餘艘世祖嘉其功降璽書獎之李瓊反奉命率所部會東平卒於軍中後贈推忠宣力功臣龍虎衛上將軍同知樞密院事上護軍追封易國公諡武定子汝楫襲從討李瓊至元六年從行元帥趙壁以舟師敗夏貴於龍尾州襄樊平汝楫功多賜銀萬五千兩十一年又從阿里海涯敗高世傑於洞庭湖卒贈推忠效節功臣資德大夫中書右丞上護軍追封易國公諡忠毅子帖哥襲從征廣西下靜江府改授水軍招討使尋復爲萬戶從征交趾有功升廣東道宣慰使卒贈資德大夫河南江北等處行中書省左丞上護軍平陽郡公

諡武宣子世英由監察御史遷山南江北道僉事卒

趙匣刺失其籍貫以父任爲千戶佩金符中統三年守東川四年宋夏貴以兵侵虎嘯山元帥欽察遣匣刺禦之貴敗走宋劉雄飛以兵犯青居山匣刺與戰於都尉壩復敗之欽察攻釣魚山別遣匣刺以兵千五百略地至南壩敗宋軍獲軍士五十七人老幼三百四十人從攻大良平宋咎萬壽運糧至渠江之鵝灘匣刺邀擊之宋兵大敗匣刺亦被三創鏃中左肩不出欽察惜其驍勇敢死囚二人刳其肩視骨節淺深知可出鑿創拔鏃出之匣刺神色不動至元三年擢東川路先鋒使四年

元帥拜答攻開州至萬寶山遣匣刺以兵五百人禦宋軍獲四十人五年兼管京兆延安兩路新軍戍東安虎嘯山兩城宋楊立以兵護糧送大良平匣刺率所部與立戰於三重山斬首百五十級立敗走棄其糧千餘石并奪其甲仗旗幟而還六年行院遣匣刺攻釣魚山之沙市焚其敵樓從左丞曲力吉思等入朝詔賞白金五十兩緡甲一注九年統軍合刺攻釣魚山以匣刺爲先鋒領兵千人略地至葛樹坪與宋兵遇生獲二十餘人斬首四十級十年三月復從合答攻釣魚山之沙市匣刺乘夜蟻附而登殺其守兵生獲二十餘人又擊敗宋